



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

KomunikaduImprensa

10 Fevereiro 2014

Komunidade Suco Raifun Distritu Bobonaro preukupa kona-ba asuntu asesu ba justisa no tratamentu sistema justisa entre povu no ema boot sira

Iha 05 Fevereiro 2014, *Judicial System Monitoring Programme* (JSMP) liu husi Unidade LRU no Relasaun Públiku (Outreach) fasilita treinamentu ba comunidade sira iha Suco Raifun Distritu Bobonaro. Partisipante sira ne'ebé partisipa iha treinamentu ne'e kompostu husi estrutura suco inklui xefe aldeia, lia nain, no joventude feto no mane. Partisipante sira ne'e hamutuk nain 30, ne'ebé konsiste ho mane nain 14 no feto nain 16.

Materia treinamentu ne'e kobre asuntu sira kona-ba direitu ema nian, kna'ar juis, prokurador, advogadu privadu no defensor públiku, klasifikasaun kazu krime sira no oinsa comunidade sira prosesa kazu krime sira tuir sistema justisa formal.

Durante sesaun treinamentu comunidade sira preokupadu no konfuzau boot tebes kona-ba konseitu direitu labarik ne'ebé dalabarak kauza labarik sira uja sala sira nia direitu no inan-aman lakon direitu atu kontrola sira nia oan. Alende ne'e sira mos preokupa kona-ba tramentu la hanesan iha lei nia oin entre ema ki'ik ka comunidade baibain ho ema boot no riku sira, prosesu justisa formal no servisu advogadu sira nian no sira nia kapasidade atu hetan advogadu kualifikadu hodi reprezenta sira iha tribunal.

"Konfuzau sira ne'e akontese tanba povu la iha informasaun diak no la iha oportunidade atu asesu ba informasaun ne'ebé los. Ne'e persiza esforsu integradu entre institusaun relevante sira estadu nian no hein katak ho atividade treinamentu ne'e bele klarifika dadaun ona buat balun relasiona dúvida no konfuzau públiku kona-ba oinsa funsionamentu justisa formal atraves husi lider komunitariu hirak ne'e, " dehan Direitór Ezekutivu JSMP, Luis Oliveira Sampaio.

Iha abertura ba trenamentu ne'e, Xefe Suco Raifun Sr. Alberto Amaral espresa nia laran haksolok tanba prezensa JSMP nian iha nia suco laran no liu-liu *tanba bele fahé asuntu importante hirak ne'e ba nia comunidade iha nia suco laran.*

Tanba ne'e nia nia husu no enkoraza partisipantes sira ne'ebé partisipa iha trenamentu ne'e, atu bele fo atensaun másimu ba materia sira ne'ebé fasilitador sira hato'o, atu nune'e informasaun sira ne'e labele lakon deit, no bele hatutan fali ba comunidade seluk .

Husi parte seluk Xefe Aldeia Raifun Sr. Manuel Lacasari, rekomenda ba JSMP atu ajuda hatutan ba entidades kompetente ne'ebé tau matan ba labarik sira ne'ebé hetan abandona husi sira nia inan ka aman, atu bele harii fatin sosial ida ba sira.

Tuir planu JSMP ninian treinamentu hanesan sei realiza iha 13 Fevereriu 2014 iha Distritu Ermera.

Atividade treinamentu ne'e realiza tanbá hetan suporta husi **Embaixada Canada iha Jakarta-Indonézia**.

Atu hetan tan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl